



CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY

JAN 22 1960






漢書卷之四

卷之四

漁洋先生著


分甘餘話



七略書堂校刊

漁洋先生著

分甘餘話



七略書堂校刊

序分甘餘話

昔王右軍在東中與吏部郎謝萬書云頃東遊還
修植桑果今盛敷榮率諸子抱弱孫游觀其間有
一味之甘割而分之以娛目前雖植德無殊邈猶
欲教養子孫以敦厚退讓庶令舉策數馬彷彿萬
石之風云云僕少時讀之已有味乎其言七十歸
田讀書之暇輒提抱弱孫以爲樂其稍長者年甫
十歲已能通易書詩三經紙牕竹屋常卧聽其呬
唔之聲不覺欣然而喜夫人幼而志學意在逢世
下而黃散上而令僕以爲至足矣僕生逢 聖世

哈佛大學漢和
圖書館珍藏印

雨山

仕宦五十載叨冒尚書年踰七袞邇來作息田間
又六載矣雖耳聾目眊猶不廢書有所聞見輒復
掌錄題曰分甘餘話庶使子孫輩知老人晚年所
樂在此爾不敢謂如袁伯業老而好學也已丑臘
月朔雪中書漁洋老人王士禎

分甘餘話卷一

漁洋老人漫筆

羣芳譜一書先祖前浙江右布政使今

皇贈

經筵講官刑部尚書

臣

象晉所著萬曆中先祖

官京師為黨人所忌借丁巳京察謫官家居十載

甘農圃以沒齒作為此書名亭曰二如以見志後

刻於虞山毛氏汲古閣流傳已久康熙四十四年

六月十二日奉

聖旨開館廣續

命編修

臣

汪

灝張逸少等四人為纂修官至四十六年二月告

成凡一百卷

賜名佩文齋廣羣芳譜

御製序

文冠於編首仍存先臣自序及每卷小序亦所不遺臣感荷 聖恩榮施泉壤謹錄 御製并述緣

起以彰 異數備家乘云原任 經筵講官刑部

尚書臣王士禎恭紀

御製廣羣芳譜序

粵自神農氏嘗草辨穀民始知樹藝醫藥伊耆氏命羲和推步定曆以授時民始知耕獲之不愆而百工績熙偉哉開物成務啓牖來茲聖帝之功與天地並矣朕聽政之暇披閱典籍留意農桑繪耕織之圖製永言之什時巡所至親歷田間其稼穡

之艱難作勞之辛苦既周知而洞悉矣每思究百昌生殖之理極萬變消長之情著為成編以佑吾民嘗謂爾雅具其名物而郭璞陸佃孫炎之流疏注埤翼又加詳焉其明備者莫如本草自本經以迄陶弘景蘇頌而下數十種凡採治之法無不該核他如齊民要術月令廣義諸書其蒔植之宜為更晰矣遐稽往牘擷其英華歸於簡括良匪易也比見近人所纂羣芳譜蒐輯衆長義類可取但惜尚多疎漏因命儒臣即秘府藏帙攬摭薈萃刪其支冗補其闕遺上原六經旁據子史洎夫稗官野

乘之言才士之所歌吟田夫之所傳述皆著於篇而竒花瑞草之產於名山貢自遠徼絕塞為前代所未見聞者亦咸列焉復允廷臣之請益以朕所賦詠依類分載總一百卷命名曰佩文齋廣羣芳譜冠以天時尊歲令也次穀次桑麻崇民事也次蔬茶果木花卉資厚生溥利用也終以藥物重民命也其諸天時早晚之候人事種溉之方地力彼此之殊物性良楛之異罔弗條舉縷析燦然可觀焉是書也攬品彙之蕃滋想羣生之率育一展卷間化機洋溢於茲畢呈固不惟矜淹洽侈藻麗也

以是刊布天下垂之久遠使吾民優游於農圃之中家室盈寧樂其業而不憚其勤而大夫士以及民之秀者因以區別物宜審其淑慝凜嗜好之常慎節宣之度於以躋仁壽而享泰平亦不為無所裨助也哉康熙四十七年五月初十日

青箱雜記云王安國詩好用酒樓常問子詩有幾酒樓余因憶康熙甲子奉命往祭南海大雪渡潯陽江後二十二年作詩贈鄆城人樊稜

稜善琵琶云

苦竹黃蘆滿目愁嘈嘈切切似江州茫茫九派多風雪憶泊潯陽舊酒樓不知安國見之以為何如

也

陳倉有古賣酒樓東坡嘗賦詩余丙子再以祭告
入蜀過之題一絕句云昨向宜春下苑遊曲江煙
草似悲秋珠簾甲觀俱黃土何必陳倉賣酒樓故
友余澹心懷詠孫楚酒樓云江南城西酒樓紅無
數楊柳迎春風孫楚去後李白醉千年不見紫髯
公余選入感舊集此亦二酒樓也

本朝凡視朝 駕未出則內閣大學士學士翰林
起居注官都察院左都御史副僉都御史先入候
駕駕出先於 保和殿升座內閣都察院起居

注官行禮畢先自 御路趨往 太和殿內閣立

殿門外東西向都察院立殿門外西東向然後
駕至升座諸王分東西班魚貫而入敷茵於地而
坐起居注班諸王後東向其諸王謝恩則拜於臺
階之上畢然後尚書以下文武官員謝恩行三跪
九叩頭禮畢然後外國陪臣行禮亦如之

汴中梁王吹臺一名繁臺以繁姓家於臺側故名
按繁姓蒲禾切音婆漢有繁延壽魏有繁欽唐有
繁知一臺以姓得名當作蒲禾切今讀作符艱切
非是

盧循盜賊而沙門慧遠與之友善祖約叛逆而少
與阮孚齊名王丞相尤愛重之曰昨與祖士少語
遂令人忘疲是皆理之不可解者杜子美贈蘇渙
詩序云蘇大侍御渙靜者也渙竟煽動嶺表與哥
舒晃作亂亦其類也

畫墁錄襄邑義塘瓜剖之色如黛而味甘如蜜余
昔寄同年劉考功公弼仁體句云側聞西湖水嫩綠
如瓜瓠用此世必疑瓜瓠無黛色者矣

康熙四十八年己丑廣西巡撫梁世勳進青駝二
長尾猿二綠鳳綠鳩各一雙

三伯祖光祿少卿養吾公象蒙萬曆庚辰進士起家

陽城知縣擢監察御史官止卿寺近始見手書詩

草一卷謹錄四篇以存其梗概鳳音鳳兮鳳兮集

高岡七德九苞稱至祥五音六律鳴朝陽鳴朝陽

應明主非帝庭寧高舉鶴鳴蒼松挺挺鶴相招振

翩翩來九霄警霜戛戛鳴九臯鳴九臯聲萬里

明月來清風起瑶琴我攜綠綺奏薰風一曲相思

彈未終淚垂絃絕送歸鴻送歸鴻坐明月人不見

心如結暮雨忽忽白雲羅神霄霏霏暮雨平河橋

有美一人路迢迢路迢迢望無極夢相見醒相憶

十叔祖翼吾公象節萬曆壬辰進士改翰林授簡討

少有詩名稿今無傳惟鄭簡菴獨復先生新城舊事

載其二句云古寺人來花作供孤城春盡草如煙

八叔祖伯石公象艮十七叔祖季木公象春十八叔祖

用晦公象明詩別詳三王公集季木公元名象巽用晦公元名象履

大內南書房在 乾清門內西廊下內直翰林官

居之其出入皆奉 旨由某門侍衛某人導引伴

送壬戌後 特旨內直官許於禁中乘馬至所出

入之門故朱簡討彛尊紀 恩詩云迴思身賤日

足繭萬山中蓋異數云

康熙四十六年 聖駕南巡至蘇州一日垂問故

靈壁知縣馬驕所著緯史 命大學士張玉書物

色原版明年四月令人賈白金二百兩至本籍鄒

平縣購版進入 內府人間無從見之矣

墨莊漫錄云濟南為郡在歷山之陰水泉清冷凡

三十餘所如舜泉爆流金線真珠孝感玉環之類

皆奇李格非文叔作歷下水記敘述甚詳文體有

法曾子固詩爆流作趵突未知孰是按文叔水記

宋人稱之者不一而不得與洛陽名園記並傳可

恨也吾郡名泉凡七十二此云三十餘者蓋未詳

也

黃牡丹今亳州曹縣皆有之荷花則未聞有黃色者墨莊漫錄云京師五岳觀凝祥池有黃蓮花甚奇僅見於此

宋丹陽陳輔訪建康楊驥題壁絕句云北山松粉未飄花白下輕風麥脚斜身似舊時王謝燕一年一度到君家風致可愛然輔不聞有詩名若唐人任華盧延讓之屬詩反得傳於後名之顯晦信有數耶

康熙甲戌余在京師歲除大雪偶邀老友姜西溟吳商志門人蔣京少查夏重宋山言周策銘殷彥來蔣靜山諸子寓齋小集酒酣隸事各賦五言詠古一章彥來詩最先成次日又以歲寒詩十五首見投余口占絕句贈之云昨夜草堂風雪裏羣賢擊鉢羨殷生朝來更愛新篇好十五詩當十五城此詩蠶尾集不載今追錄於此

一時公卿和彥來歲寒詩者凡數十家田綸霞少司徒為授之梓澤州相國作序韓宗伯慕廬作跋亦藝林佳話因牽連記之

余嘗謂東坡鳳翔八觀詩不減杜子美宋人亦謂

張芸叟鳳翔吳道子畫記不減韓退之

柳耆卿卒於京口王和甫葬之然今儀真西地名仙人掌有柳墓則是葬於真州非潤州也余少在廣陵有詩云江鄉春事最堪憐寒食清明欲禁煙殘月曉風仙掌路何人爲弔柳屯田

余官祭酒日有送陳子文歸安邑詩云月暎清淮何水部雲飛隴首柳吳興按葉石林云山抹微雲秦學士露花倒影柳屯田又李易安云露花倒影柳三變桂子飄香張九成或謂余句法本此竊自謂青出於藍後當有知之者

近歲遭逢之奇無如毘陵趙中丞申喬者申喬康熙庚戌進士初仕爲商丘令陞刑部員外郎引疾家居特旨起擢浙江布政使尋巡撫其地弟申季丁丑進士自廣西知縣召入翰林子鳳詔戊辰進士知臨汾縣甫一載超擢太原知府熊詔巳丑進士特賜狀元及第

宋開府牧仲犛遭遇亦奇牧仲以江寧巡撫副都御史超拜吏部尚書子至癸未進士入翰林爲編修致福建僉事未一載擢按察使筠己丑進士入翰林爲庶吉士

避暑錄言平生用目力常數倍於他人安得不敝
因歷稽古左丘明杜子夏鄭康成高堂隆左太冲
諸人皆以讀書致然余自幼小凡博弈諸戲一無
所好唯嗜讀書雖官戶部侍郎刑部尚書最繁劇
之地下直亦手不釋書卷也自甲申歸田六年矣
目力益昏始悔少壯之過用其力然老矣終亦不
能廢書也

唐韓翃以春城無處不飛花一詩見知九重召知
制誥傳爲佳話世盡知之杜陽雜編又載一事德
宗西幸有二馬一號神智驄一號如意騮貞元三

年蜀中進瑞鞭有麟鳳龜龍之形色類琥珀一日
將幸諸苑內廐進瑞鞭上顧近臣曰昔朕西幸有
二駿稱二絕今獲此鞭可稱三絕矣因吟曰鴛鴦
赭白齒新齊曉日花間散碧蹄玉勒乍迴初噴沫
金鞭欲下不成嘶亦翃作也知翃詩流聞禁中者
多不獨寒食東風之句而已

丹徒張氏吏部文選郎中九徵順治乙酉解元丁
亥進士終河南督學諸子玉裁康熙丁未進士第
一甲第二人及第終翰林院編修玉書文華殿大
學士兼戶部尚書仕可康熙丙辰進士亦以僉事

爲河南督學遷湖廣布政使司叅議恕可康熙戊辰進士浙江杭州府知府玉書子逸少康熙甲戌進士翰林院編修

李時謙字吉爻淮安山陽人順治辛丑進士初爲潞安府推官歷樂陵黎城二縣知縣有清白名內召爲監察御史號稱廉正久之引疾里居陝西大饑特起爲督糧道叅議操守孤介不名一錢未幾卒官將軍督撫布按已下往弔蓬蒿滿庭至無含斂之具皆爲揮涕醵金買棺代爲含斂而歸其喪於江淮余昔官副都御史識其爲人蓋古之君子也

道君時以言官建議習詩賦者杖一百有尹天民者爲南京教官至之日悉取史記以下至歐陽史焚講堂下王安石之學術爲害於世道人心如此又按建言者御史李彥章也疏以詩賦爲元祐學術其意在黃秦晁張四學士而並劾及前代陶淵明杜子美李太白皆貶之尤可笑定律令則何執中也二子可謂失其本心無恥之尤者矣

唐中宗時羣臣多應制賦詩如崔湜鄭愔宋之問輩皆人頭畜鳴張柬之等五王皆死此三人之手

蓋將以擁戴武三思危唐社稷與宗楚客厥罪維均乃鴟梟之音亦溷風雅每觀唐詩至此未嘗不髮指也

今朝廷凡覃恩有移贈之例謂輟已應得封典而贈本生父母也唐李德裕任荆南節度使檢校司徒平章事遇覃恩當追贈祖父乃乞迴贈其兄故楚州刺史工部侍郎德修為禮部尚書此竊例古今未聞

久客見華髮孤棹桐廬歸新月無朗照落日有餘暉漁浦風水急龍山煙火微時聞沙上鴈一一皆

南飛右宋初潘閬詩也高妙不減岑嘉州又夜涼疑有雨院靜若無僧亦佳句故友施侍讀愚山閬章宿越州天衣寺云月照竹林早露從衣袂生亦不

減閬語

淳熙八年中秋節孝宗詣德壽宮太上留宴香遠堂堂東有萬歲橋以白玉石為之雕闌瑩徹上作四面亭皆用新羅白木與橋一色大池十餘畝植千葉白蓮御榻屏几酒器皆用水晶獨召小劉妃吹白玉笙作霓裳中序每觀此一段風景不啻明皇夢游廣寒也今年中秋陰晦薄暮遂雨終夜淋

滴不止煞風景乃爾因錄此以當夢遊

余少官廣陵同年義興萬雲黻錦罷於潛令來揚

州揖罷余亟問曰還有於潛絹也無萬茫然既坐

定俯首思之忽悟乃大笑茶杯幾覆

醴泉寺在長白山之西西有大溪溪中多巨石紅

葉時最可游憩石下產小蟹百十為羣一二寸之

魚泳游其間與日影相映恍惚無定去吾別業才

七八里余有詩云千林紅葉多亂此一溪水葉逝

水空明魚苗可憐紫唐詩魚鱗可憐紫石根如蠚堞螯跪五

銖小瑣詰腹中居何似清流好

崔子忠字青蚓又字道母登州萊陽人居京師工

畫山水人物王崇節字筠侶文貞之弟文靖季父

也官把總生於閩閩而任誕不羈視富貴蔑如也

畫學青蚓京師貴之故相國梁公玉立清常以筠

侶畫草蟲索題余賦二絕句云髯翁任誕如忠恕

脫屣朱門傲五侯肯為尚書寫幽興碧花紅穗草

堂秋一幅丹青顧野王草根纖意曲籬旁風懷磊

落如公少便注蟲魚也未妨

高念東先生珩作少宰日忽賦一詩題曰願作杭

嚴道或訝而問之荅曰吾平生慕西湖嚴灘山水

之勝聊以寄興耳官資高卑不暇計也其漫興如此

宋丁謂爲福建轉運使始造龍鳳團茶上供不過四十餅天聖中又造小團其品過於大團神宗時命造密雲龍其品又過於小團元祐初宣仁皇太后曰指揮建州此後更不許造密雲龍亦不要團茶揀好茶喫生得甚好意智宣仁改熙寧之政此其小者顧其言實可爲萬世法士大夫家膏粱子弟尤不可不知也謹備錄之

唐張旭以草聖名世畫墁錄云長安府錄廳有唐吏部郎官題名碑張長史書序楷法整若軍陣云云世言長史書法傳顏魯公觀此信然

吾家祖訓廳事屏風所書心相三十六善余已於香祖筆記詳其出處惟陽宅三十六祥不記所出近始考得之乃宋曾空青語也空青名紆山谷之友元祐君子也

余官御史大夫時嘗蒙 御筆賜一堂聯云煙霞盡入新詩卷郭邑閑開古畫圖又嘗被 賜御書帶經堂信古齋二扁今分懸東西二第中堂誌聖恩示子孫不敢誼也

蔣修撰虎臣^超先生癸丑歿於峨眉既二十五年矣余丙子再使蜀甫入劔門關宿於驛舍忽夢先生來迓執手微笑而無一語似以不二法門相示者異哉若先生者真不死也

蜀僧果菴詩軒牕無暑覺雲起竹樹有聲知雨來先祖方伯贈尚書府君與伯祖兵部尚書太師府君為胞兄弟太師篤信堪輿家常有數輩在客舍方伯常非之自卜兆域於高祖忠勤公塋之西恒語先贈尚書初至此地覺足下步步如登高然然實平地耳心以為吉壤即決意用之葬兩祖母夫

人而太師所擇在淄川縣北距新城六十里竟無後方伯子孫眾多愚兄弟同胞四人三人成進士府君初贈戶部左右侍郎累贈刑部尚書皆帶經筵講官始知術士之言不足聽而府君高見為不可及也

同邑沈澄川^淵先生幼時喪父太夫人欲卜吉壤不肯延致堪輿家但每夜至舍後近地縱橫步之再三忽曰此即吉地也遂卜窆焉後沈公成嘉靖乙丑進士入翰林官國子司業卒以東宮講官舊勞特予祭葬

崑山顧炎武號亭林揚之通州有老儒古姓號辣泉同年孟縣薛給事奮生號老峰皆地名泉名峰名連姓字巧合者亦奇古人不記有此例否當博考之

異聞錄言宋太平興國中編次御覽引用書一千六百九十種以今考之其無傳者十之七八矣姚鉉以祥符四年集唐文粹其序云今歷代墳籍略無亡逸觀鉉所類文集亦多不存云云當五代亂離板蕩之後而古書多存歷北宋太平全盛之世而古書反亡殊不可解豈金源入汴其兵火之厄

反甚於五代時與

宋張蘊爲淄州兵馬監押咸平中契丹犯境有全城之功後爲環州監押雖處窮邊猶建孔子廟慶曆中范文正過之書其碑陰以美之子揆揆以文學才行有名於世皆登侍從右見澠水燕談錄今濟南郡城東三十里王舍人店有東坡所書讀書臺三大字石刻耕者出之田間挾遺蹟也

范文正公幼隨其母客濟南長山縣而讀書長白山之醴泉寺今長山城外孝水南岸有公祠城西十五里禮叅店公所常往來之地後公守青州過

分古餘言卷一
長山父老迎候於此從曾叔祖開封太守曙峰公
都作三賢祠於市之西北隅以祀公與陳仲子伏
生香火至今不絕文正集舊刻大字本編首有禮
叅店圖俗譌爲李三店非也

翟院深與李成皆營丘人而院深伶工也一日太
守讌會院深擊鼓失節召問之對曰適仰見飛鴻
淡佇可愛思欲圖寫凝思久之不知鼓聲之失節
也院深名在宣和畫譜與史邦卿以堂吏而名列
詞中大家皆奇事

章丘縣西北有甯戚城春秋齊甯戚采邑今縣有
甯氏尚爲巨族余嘗輓從甥甯生一聯云相國悲
歌扣牛角仙人暫死食飛魚次句用列仙傳甯封
事皆甯氏也

田侍郎綸霞雯言巡撫貴州日署中庭砌間有草
結實紅如珊瑚可愛熟時有小鳥紅色羽毛甚麗
來食此草問之吏卒云此斷腸草也鳥亦名斷腸
鳥專以此草爲食皆有大毒余觀冷齋夜話云斷
腸草不可食其花美好名芙蓉花出陶貞白仙方
其說稍異

唐鄭綮云詩思在灞橋驢子背上胡擢云吾詩思

若在三峽聞猿聲時也余少在廣陵作論詩絕句
其一云詩情合在空舫峽冷雁哀猿和竹枝用擢
語也後壬子秋典蜀試歸舟下三峽夜泊空舫月
下聞猿聲忽悟前詩乃知事皆前定

已丑歲自春夏至秋八月多雨書屋後叢竹甚茂
雨後鵝兒鴨雛拍浮其間頗似畫本余賦絕句云
紫竹林中水滿塘鵝兒得意弄輕黃韞材賸有鵝
溪絹合付邊鸞與趙昌從姪磊字石丈善丹青當
令補作一圖

余嘗謂柳子厚漁翁夜傍西岩宿一首末二句蛇

足刪作絕句乃佳東坡論此詩亦云末二句可不
必

老杜詩白鳥去邊明坡公詩貪看白鳥橫秋浦不
覺青林沒晚潮余少登京口北固山多景樓亦有
句云高飛白鳥過江明一時即目不覺暗合

洪覺範云遠公拒謝康樂入社而與盧循執手言
笑謂遠知人則何暗於循謂不知人則何明於靈
運余於此段公案固常疑之然又念遠開蓮社衆
至百數十人何其多耶豈此百數十人者心盡不
雜過康樂乎抑來者不拒乎宜淵明之攢眉而獨

拒一康樂何說耶恨不起遠於地下而問之

重陽前一日風雨觀冷齋夜話劉跛子事戲為絕

句云不從勾漏覓丹砂不借颺輪轉法華祇愛青

州劉跛子一年一看雒陽花又云蜂蝶蕭疎春日

斜雒陽花事委泥沙野人久狎東籬菊不愛鋪堂

富貴花

南唐徐熙畫牡丹
進御謂之鋪堂花

余少與考功西樵兄言史事自十七史外如史記

外則有蘇氏古史前後漢書外有荀悅袁宏兩漢

紀三國志外有謝陞季漢書晉書外有崔鴻十六

國春秋南北史宋齊梁陳隋諸書外有王通元經

新唐書外有劉昫舊唐書范祖禹唐鑑五代史外

有薛居正舊史及馬令陸游胡恢南唐書宋史外北

宋有王偁東都事略曾鞏隆平集南宋有李心傳三

朝朝野彙編葉紹翁四朝聞見錄元史外有蘇天

爵名臣事略凡此諸書皆當兼收並採不可以其

不列學官而偏廢之兄亟然其言今五十餘年矣

白首汗青徒有愧歎而西樵下世已三十七年已

丑重陽秋霖乍霽偶憶往事援筆記此

東坡廬山詩云溪聲即是廣長舌山色豈非清淨

身萬曆中董思白其昌宗伯寄先大司馬太師府君

詩云饒歌即是廣長舌大燾豈非精進幢全襲坡
語稍變其意耳時府君以兵部尚書視師行邊故
云

余嘗不解吳俗好尚有三鬪馬弔牌喫河豚魚敬
畏五通邪神雖士大夫不能免近馬弔漸及北方
又加以混江遊湖種種諸戲吾里縉紳子弟多廢
學競爲之不數年而貲產蕩盡至有父母之殯在
堂而第宅已鬻他姓者終不悔也始作俑者安得
尚方斬馬劔誅之以正人心以維惡俗乎或云宋
楊文公大年好葉子戲

東坡志林記杜處士蓄戴嵩畫牛一幅甚寶惜之
有牧童見而笑曰牛鬪力在角尾當搐入兩股間
今掉尾而鬪謬矣此與黃筌別畫鍾馗抉鬼眼精
神意思俱在拇指同旨

每見人家子孫留意祖父著述手澤往往不多得
陸放翁記張子功樞密云先人有遺稿滿四篋字
畫極難辨惟某識之某若死則皆不傳豈容不急
歸耶此意今人知者蓋鮮矣余所見葉文莊與中

^盛遺集寫冊皆手自點竄鈎勒藏其裔孫文敏訥
菴^方處文敏仕爲學士侍郎加尚書矣余屢勸刻

之竟不果興化李映碧清廷尉丞好著書常以陸游馬令二家為經別修南唐書而以江表志鈞磯立談諸書為緯尊李氏為正統其書頗可傳子木菴柎官御史大夫延余門人嘉定張雲章漢瞻專司讐校之役荏苒數年竟未剖劂而木菴死矣右皆有賢子孫且官通顯而不及傳先人之書使流通於後世况其下焉者乎可歎也

老學菴筆記云北方多石炭南方多木炭蜀多竹炭余詢之門人南部李曲江少司馬先復云蜀中初無竹炭不知宋時何以有之或古有之而其法不

傳耶

中州集載楊雲翼詩金波曾醉雁門州信有人間五月秋萬古河山雄朔部四時風月入南樓云云誠佳作也近李梅厓中丞基和代州詩云誰識雁門今夜月山川別樣在冰壺亦是佳句而彼土之高涼可以想見矣

金李汾長源詩煙波蒼蒼孟津戍旌旗歷歷河陽城不減少陵東坡

臨邑行太僕卿邢子愿先生侗以書名萬曆間取法晉人不落唐宋窠臼其邑人王葱岳大司馬洽

萃其書為來禽館帖凡數十卷時號北邢南董今董書盛行海內而邢書知之者鮮矣余西城別墅茂林修竹四大字是其真蹟

陸務觀云吾鄉鏡湖為入侵耕幾盡閬州南池數百頃亦為平陸古今勝蹟往往陵谷遷移如此吾郡明湖幾分城之半四五十年前湖面甚闊近為人家佔作藕塘此疆彼界畫為溝塍舟行渠中了無煙波浩淼之趣幾何不為鏡湖南池之續耶為之一歎

方龔山

文

冬日林茂之前輩見過云積雪初晴鳥

晒毛閑攜幼女出林臯家人莫怪兒衣薄八十五翁猶緼袍龔山又有詩云烏衣巷口多芳草明日重過是早春亦佳句

唐僖宗朝南詔請和親遣宗正少卿李龜年充使是又一李龜年

自科場許五經中式而習者益眾數科以來如直隸陝西某某皆以五經掄元戊子江西解元李紱臨川人五經文二三場皆刻程文悉博大精深殆有萬夫之稟今官庶常何澹菴世基翰林云渠讀書一覽輒誦不忘也

一水水名也酈注渭水又東會一水水發吳山地
里志吳山古沂山也山下石穴水溢石空懸波側
注按此即一水之源在靈應峰下所謂西鎮靈湫
是也余丙子祭告西鎮嘗品茶於此與西山玉泉
極相似

吳天章荅人云自卜條南舊隱居明星玉女對攤
書門前萬里崑崙水千點桃花尺半魚又至今堯
峰上猶上堯時日又河聲過雷首雨氣下風陵
西樵古意云鷓鴣兩兩栖浦沙昨夜郎來眠妾家
滅燭入門帶星去看郎一似菖蒲花最質而古

分甘餘話卷一 終

分甘餘話卷二

漁洋老人漫筆

真定府臨濟寺唐義玄禪師道場余以康熙丙子
過之荒涼頽落闕無一僧今臨濟兒孫滿天下名
山大刹開堂領衆者不可勝數而祖庭敗壞如此
無一人任興復者余因憶宋僧證悟法師題馬祖
殿云寄語江西老古錐任教日炙與風吹兒孫不
是無料理要見冰消瓦解時遂題是詩於佛殿之
壁今又十三年矣不知竟有擔當此事者否也
黃始字靜御吳人有詩云一聲啼鳥半江月才到

兩山天欲明

李文饒牛僧孺君子小人判然也潁濱並稱為豪傑之士而東坡戲為酒令云牛僧孺父子犯罪先斬小畜後斬大畜然則僧孺之人可知矣可與贊皇並稱乎明彭澤王瓊如參商水火之不相能其為邪正亦易見也乃李贄名臣傳列瓊而澤則附見之公議安在

余少時評陳卧子

子龍

湘真詞如香車金犢流連陌

阡轉令人思草頭一點之樂

凡為詩文貴有節制即詞曲亦然正調至秦少游

李易安為極致若柳耆卿則靡矣變調至東坡為極致辛稼軒豪於東坡而不免稍過若劉改之則惡道矣學者不可以不辨

前輩嘗言諸佛經多出六朝唐人文士之筆初亦疑之然觀唐貞觀中令玄奘法師譯諸經有譯經使十餘人又諭有不穩當處隨即改正則所云多出文士之筆良然

漢中府治月臺東南隅有璞石如鼓而方高二尺六寸圍八尺脰間作四獸面有剖露痕審視之真碧玉也門人陳子文奕禧益州于役記云制似壘相

傳是楚漢間物未詳

本朝狀元必選書法之優者順治中世祖皇帝喜歐陽詢書而壬辰狀元鄒忠倚戊戌狀元孫承恩皆法歐書者也康熙以來上喜二王書而已未狀元歸允肅壬戌狀元蔡升元庚辰狀元汪繹皆法黃庭經樂毅論者也惟戊辰進士中工二王體者首推海寧查昇以其族叔嗣韓兼習五經拔置鼎甲昇遂抑置二甲丁未進士工書者首棗強宋師初而不與鼎甲又不與吉士之選終於一令亦可惜也

宋字中郎

秦羅敷數字或作紂李西臺書小詞亦作羅紂懶真子引漢書昌邑王賀妾名羅紂乃嚴延年女孫然不言敷紂二字何以通用或有博雅者知之俟考

歸田錄言張僕射飲啖過人晏元獻所食至少近人亦有相類者孟津王文安公

鐸

在京師諸公欲

乞書輒置酒邀之飲無算爵或烹雞卵數十盛以巨盎破餬飩蒸餅亦數十枚雜投其中而食之立盡康熙辛未余貳京江相國張公素存

玉書

典會試

每五鼓必秉燭起坐夜則和衣而寢食時或切山

藥極薄煮熟置盃中不過五七片或炒米少許而
已

韓慕廬宗伯

葵

嗜煙草及酒康熙戊午與余同典

順天武闈酒杯煙筒不離於手余戲問曰二者乃
公熊魚之嗜則知之矣必不得已而去二者何先
慕廬俯首思之良久荅曰去酒衆爲一笑後余考
姚旅露書煙草產呂宋本名淡巴菰以告慕廬慕
廬時掌翰林院事教習庶吉士乃命其門人輩賦
淡巴菰歌

故友程石臞南海人嗜檳榔官兵部職方郎中一

日早朝余戲占口號贈之云趨朝夜永未渠央聽
鼓應平官有底忙行到前門門未啓轎中端坐喫
檳榔聞者皆爲絕倒按輿轎見前漢書

康熙乙丑余奉使南海見六榕寺一立佛像皆以
珠玉珊瑚瑪瑙琥珀蜜蠟琿渠諸寶莊嚴之已爲
希有頃聞京師鬻一紫檀坐椅制度精絕亦以珠
玉等諸寶爲飾一方伯之子欲以百二十金購之
德州李庶常文衆棟力止之乃已此真所謂竒技
淫巧者也

近科鼎甲三人皆至八座者甚少同時者更少惟

癸丑狀元韓菼第二人王鴻緒第三人徐秉義同
時爲八座韓禮部尚書王工部尚書徐吏部侍郎
衣冠詫爲盛事 本朝設科已來所未有也歸田
錄記首甲三人並登兩府者惟天聖五年一榜此
足相匹

六朝人謂文爲筆齊梁間江左有沈詩任筆之語
謂沈約之詩任昉之文也然余觀彥昇之詩實勝
休文遠甚當時惟玄暉足相匹敵耳休文不足道
也

廣平張蓋字覆輿申鳧盟涵光友也常有贈申一

絕句云草澤賢豪盡上書奎章閣外即公車我同
漁父因衰老獨有涵光是隱居金陵黃周星九煙
明末進士也贈長洲尤悔菴云今朝喜得見尤侗
皆直呼其名此以古道自處故以古道待其友非
知己之深者不能也俗人且以爲倨傲無禮矣明
鹽山王忠肅公朝官太宰滄州馬恭襄公昂官大
司馬忠肅在朝每面呼其名此尤古道之不易行
者又非詩文之比

有獻古鏡於呂文穆者云可照二百里公曰吾面
不過楮子大安用照二百里歐陽公以爲得宰相

之體吾鄉一先達家居子姓偶言及曹縣五色牡丹之竒請移植之荅曰牡丹佳矣然不知能結饅頭否此與呂事相類但其人非耳

一鄉先達在明啓禎初不爲清議所許常訓子孫勿學爲古詩作古詩恐壞人心術或聞之笑曰沈休文始勗四聲想當爲君子第一但不知何以處陶淵明

田元均爲三司使厭權貴干請然不欲峻拒每溫言強笑以遣之謂人曰吾爲三司使數年強笑多矣直笑得面似靴皮此歸田錄所載本非佳語而

月泉吟社謝送詩賞劄中有云執事吟髯似戟笑面如靴引用殊不倫矣

傅彤臣

辰

修軀偉貌鬚眉如戟博學強記冠絕一

時常過一友人家友人有女爲狐所祟聞傅至忽語曰傅公正人將來必貴吾去矣果去不復來彤臣辛卯舉鄉試乙未舉會試皆與余同年仕至江西道監察御史

唐三司使不專領財賦鹽鐵之事凡鞫獄以尚書侍郎與御史中丞大理卿爲三司使即明代及本朝之三法司也

韓蘄王岳鄂王皆有背崕軍范石湖云燕中謂酒
餅曰崕其大將酒餅皆令親隨人負之故號背崕
韓岳取其名以名親軍爾

劉麟引衆南侵趙九齡獻策決淮西之水以灌其
營麟聞之遂遁去九齡字次張與龍伯可皆奇士
陳同父作中興列傳特標出之此事見雲麓漫鈔
惜當時不能用也

漢明帝時西域僧迦葉摩騰竺法蘭以白馬馱經
至雒陽處之於鴻臚寺故後世僧所居皆曰寺元
帝被疾求方士漢中送道士王仲都處之於昆明

觀故後世道士所居皆曰觀上見雒陽伽藍記及
石林燕語下見雲麓漫鈔

本朝侍衛皆於冠上帶孔雀翎以日暈之多寡爲
品之等級武臣提督及總兵官亦有 賜者後文
臣督撫亦或蒙 賜得之者以爲榮袍帽初以紫
貂爲貴康熙以來尤貴元狐非閣臣不得 賜尚
書亦有蒙 賜者厥名元狐而色實蒼白也

渭南南氏自大吉逢吉而下衣冠之盛與靈寶之
許餘姚之孫相鼎足若吏部尚書企仲禮部尚書
師仲國子祭酒居仁工部尚書居益其尤著者余

為禮部郎官時與宗伯孫廷鉉鼎甫同舍相得甚
歡一日同人讌集余兩人接坐偶談及前明掌故
吏部劉公戡體仁從旁歎曰大家兒固當不同

余同年張禮部者河南人面黥而好傅粉澤順治
庚子與同年何行人蕤音元英同典廣西鄉試桂林
人為之語曰本是箇畫眉張敞倒做了傅粉何郎
辛丑春余客秦淮適何歸自粵過金陵酒間談此
坐客皆為捧腹絕倒

趙承旨家宋槧前後漢書王大司寇弇州得之陸
水邨完家前有松雪小像後錢牧齋大宗伯以千
二百金購之新安賈人復售於四明謝氏自跋云
此書去我之日殊難為懷李後主去國聽教坊雜
曲揮淚對宮娥一段淒涼景色約略相似此書後
又歸新鄉張司馬坦公康熙中有人攜至京師索
價甚高真定梁蒼岩大司馬酬以五百金不售攜
去後不知歸誰何矣

虞山錢先生跋東都事略述歸熙甫湯若士王損
仲三家刪宋史始末甚詳云熙甫未有成書止別
集有宋史論贊一卷若士閱宋史朱墨塗乙某傳
宜刪某傳宜補某人宜合某傳某某宜附某傳皆

注目錄之下州次部居釐然可觀天啓中損仲起
廢籍爲寺丞過余邸舍必商宋史時李九如少卿
藏宋宰輔編年錄及王秘閣稱東都事略三百卷
損仲從史余傳寫并約購宋李燾續通鑑長編以
藏此書今損仲草稿及臨川宋史舊本皆在吳興
潘昭度家云云余昔在京師所見即臨川手筆所
謂朱墨塗乙者是也余曾鈔其目錄祥符草稿則
不可得而見矣又聞吉水劉狀元晉卿上公車祇
攜宋史刪本或即臨川本耶

慧持東林慧遠之弟也遊峨眉山於樹中入定宋

時有人見之以聞於上始言始末問今何往答言
欲往陳留又一書云明時復有人見之陳留亦入
定樹中似是傳會以神其事又宋時或漁於潭得
一鴟夷內有一人酣卧初覺問之曰我譚紫霄也
宋齊丘竊吾書沈吾水底漁者欲出之曰此間甚
適不須出也此亦似傳會之說學仙佛者故欲神
其事耳

葉氏習學記言不如黃氏日鈔黃氏日鈔不如龔
州先生讀書後

嚴滄浪論詩特拈妙悟二字及所云不涉理路不

落言詮又鏡中之象水中之月羚羊挂角無跡可尋云云皆發前人未發之秘而常熟馮班詆諆之不遺餘力如周興來俊臣之流文致士大夫鍛鍊周內無所不至不謂風雅中乃有此羅織經也昔胡元瑞作正楊識者非之近吳及修齡作正錢余在京師亦嘗面規之若馮君雖黃之口又甚於胡吳輩矣此等謬論爲害於詩教非小明眼人自當辨之至敢詈滄浪爲一竅不通一字不識則尤似醉人罵坐聞之唯掩耳走避而已

孟子曰仲尼之門無道桓文之事者子貢又聖門高弟也吳越春秋越絕書言子貢一出而存魯亂齊亡吳霸越若如所云乃蘇張之前茅耳不惟說壞子貢亦辱聖門矣

余生平最愛楓葉行吳楚間所見多矣尤愛雪中楓柏淺深相間有如畫圖己丑九月下浣六日未霜而有微雪大兒凍以石帆亭楓葉十餘片至微紅可愛輒從枕上賦一詩云秋雨連宵響菊叢石帆亭畔小池東正衙無夢頒新曆六見池邊楓葉紅時去十月朔頒曆才四日

順治辛丑春雨中泊舟楓橋寄先兄西樵二絕句

分世餘言卷二
十一
云日暮東塘正落潮孤蓬泊處雨瀟瀟疎鐘夜火
寒山寺又過吳楓第幾橋楓葉蕭條水驛空離居
千里悵難同十年舊約江南夢獨聽寒山半夜鐘
今荏苒五十年矣西樵下世亦已三十餘年回思
往事爲之憮然而歎

今新進士賜讌謂之瓊林讌瓊林宋京城四御苑
之一石林燕語瓊林苑金明池每二月命士庶縱
觀謂之開池歲賜二府從官讌於此進士聞喜讌
亦在焉自明代相沿至今猶唐之題名雁塔也
宋仁宗常問宰執修唐書時何不專命歐陽修又

諭舊唐書不可廢真聖人也

明世宗時議大禮與宋英宗時濮議事體稍異蓋
仁宗養英宗於宮中立爲皇子已久名分久定於
禮毫無可疑故溫公之疏曰今上爲仁宗子而稱
濮王爲皇考則置仁宗於何地此萬古不易之論
也世宗未爲孝宗之子又承武宗之後故稍有不
同張孚敬桂萼因得乘間抵隙逢迎以售其說而
躡取大位然楊文忠以下凡得罪者其心不忍負
孝宗皆君子也張桂方獻夫霍韜之徒僥倖干進
志在逢迎皆小人也曩史館開局時諸人尚有紛

紘之論林下退閑偶讀歐陽司馬二公集聊復論
之若歐陽公賢者而其議濮事則亦敢於負仁宗
者吾終不敢以為是也

昔亡友葉文敏評余蜀道集詩毋論大篇短章每
首具有二十分力量所謂師子搏象兔皆用全力
者也余深愧其言陳元孝恭尹評余南海集雖不及
蜀道之宏放而天然處乃反過之此亦知言文敏
又嘗語余兄七言長句他人不能及祇是熟得史
記漢書耳

忠武侯討魏通鑑以寇書千古公憤故元人楊奐
詩曰欲起溫公問書法武侯入寇寇誰家余讀通
鑑至後唐莊宗欲討偽梁亦以謀入寇書不禁髮
指亦題一詩曰一代清流盡喪亡紘千山雀可憐
傷溫公書法憑誰問又說河東欲寇梁

如來會中阿那律多無目而見跋難陀龍無耳而
聽殍伽神女非鼻聞香驕梵鉢提異舌知味舜若
多神無身覺觸今吾年逾七十有耳而不能聽有
目而不能見是見聞二根先去雖欲讀書娛老而
亦不能矣古人云聰明智慧殊不再來為之三歎
世祖皇帝順治中各省布政使內陞有徑陞侍郎

者或通政使大理卿宗人府府丞康熙中重定品級考布政使外陞巡撫副都御史內陞則太常卿順天府尹間亦遷光祿太僕正卿已丑 特命廷臣薦舉翰林藩臬可任京卿者以江西布政使孟世泰為鴻臚寺卿廣西布政使李濤為太常寺少卿江南布政使李法祖為順天府府丞舊制按察使內陞則大理寺少卿左右通政是外之三品陞內之大四品也布政使陞常少鴻臚府丞則以外之二品陞內之小四品也又與常例不同
余庚午為副憲值御史內陞外轉之期時于振甲

成龍莅總憲任甫三日 上在暢春苑有 旨下詢

于公以問余余曰臺規內陞皆論資俸近多越次躐陞徒長奔競無益勸懲今河南道常翼聖有才京畿道梅銷有守而資俸俱深內陞之序當首常次梅則公道明人心服矣明日 旨下常內陞次年梅繼之已卯余為總憲引見諸御史於 乾清門御史既下殿 上詢余當內陞者余力薦河南道李斯義端慎敏練是日 旨下李內陞余掌都察院一循臺規即一掌道亦必論資俸不敢徇一情面以長奔競余既遷去又不盡然矣

分世餘詩卷二
三
余為御史大夫時漢軍御史郭金城上疏請裁冗員下九卿議遂有欲裁御史數員者余毅然爭之曰國初設都察院御史至六十員後減至四十員及停止巡按之差所存僅二十四員每至巡城監禮侍班等差往往乏人余方欲題增數員豈可反議裁乎都察院非冗散衙門御史非冗散之官斷不可裁如有異同之論余必上疏力爭之衆皆以余言為然事乃已

余門人廣陵宗梅岑名元鼎居東原其詩本才調集風華婉媚自成一家常題吳江顧樵小畫寄余

京師云青山野寺紅楓樹黃草人家白酒筍日暮江南堪畫處數聲漁笛起汀洲余賦絕句報之云東原佳句紅楓樹付與丹青顧愷之把玩居然成兩絕詩中有畫畫中詩顧字樵水亦名士

門人殷彥來寄其亡友夏生任遠遺詩僅一卷中有和余秋柳詩四首頗可誦其秋夜讀九歌云湘皇淚雨滋叢竹山鬼悲風帶女蘿春寒云梨花落地半窓雨柳絮入簾三日風皆晚唐佳句彥來傷其不遇早天為序而傳之友道亦可風也

夏即余門人九敘從子其

能詩
妹亦

余在九卿時薦舉人才甚多率不令其人知之故
時有冒竊居功者聞之一笑而已如孟世泰李濤
鞠宸咨莊摺衛台瑞劉元勳之屬蓋不下十餘人
至今屢被遷擢尚有不知者宋蘇魏公云平生薦
舉不知幾何人惟孟安序朝奉歲以雙井茶一甕
相餉古今一也要視其出於公出於私爾聞往昔
薦一人有酬謝不訾者

吾郡楊太宰夢山先生

魏

五言冲古淡泊在高子

業華子潛季孟間如遠道令人愁况近單于壘秋
風入鴈門羽書日三至微微霽景流天壤色俱素

鄉心生塞草世事入秋風風雨樓煩國關山李牧
祠閑將流水引夢與古人居雨響殘秋地城分不
夜天石古苔生徧泉香麝過餘皆逼古作

余平生交友不敢自居於薄在京師遇施愚山沈
繹堂李容齋葉訥菴數公之喪哭必盡哀今人雖
至交指天日盟肺腑及勢分相埒聲名相亞遂忘
夙好而反下石者有之矣可歎也

古德云水鳥樹林皆為說法又云狗子具佛性此
非虛語近耳目聞見如京師某寺之蜘蛛塔安陸
之念佛鳥靖州之聽經鶯皆昭灼在人耳目者新

城北郭真武廟老道士趙雲山戒行清苦每誦經
輒有一蛇跼伏其旁久益馴擾雲山歿蛇亦去不
見以是推之露柱瓦礫皆可知也

康熙丙子余再以祭告使蜀歸次朝天關土人云
某寺有一豕每聞僧徒誦經輒隨其後禮拜誦畢
即卧佛座之下性好潔欲溲溺則出往山間皆有
常度過者必往看之今尚在

明大梁周藩有一虎衛宮門長齋不噬雖投以豚
蹄亦不食也先大父尚書公官汴臬時親見之蜀
中瓦屋山有貔貅不食人及牛犬之屬惟食虎豹

口常誦阿彌陀佛山中僧徒以為法護

宋南渡後高宗最重蘇黃詩文筆墨求其子孫官
之徐俯師川亦以山谷之甥馴至通顯其詩本江
西派也貴後或以書賀之稍及山谷淵源師川荅
云涪翁之妙天下君其問諸水濱噫安得此負心
之語

治腋氣熱蒸餅一枚擘作兩片糝蜜陀僧一錢許
急挾之腋下少睡片時俟冷棄之

北齊竇泰母期而不產有媪教之曰渡河湔裙生
子必易從之生泰胡文恭宿詩猶餘仙媪湔裙水

幾見星妃度襪塵

立秋日日未出採楸葉熬膏傳瘡瘍立愈

皮硝入雞腹中煮食消痞

以上方見說楛

瓶瓠盛酒器也大者一石小者五斗亦作鴟夷

紀侯臺在今壽光縣南三十里春秋紀國也耕者

常於臺下得一玉磴宋太平興國中鄭州修東岳

廟於地中得玉杵臼皆不知何所用之

余作浯溪考成又得唐蔡京鄭谷宋釋惠洪數詩

錄為補遺適見清波雜誌一條姑錄於此云浯溪

中興頌碑自唐至今題詠實繁零陵近雖刊行止

薈萃已入石者未暇廣搜博訪也趙明誠待制妻

易安李氏常和張文潛二長句以婦人而廁眾作

非深有思致者能之乎李易安詩二篇曩從陳士

業宏緒寒夜錄鈔出已入集中忘其出處本周輝也

諸說皆言王介甫與宋次道同為三司判官時次

道出其家藏唐詩百餘編俾介甫選其佳者介甫

使吏鈔錄吏倦於書寫每遇長篇輒削去今所傳

本乃羣牧吏所刪也余觀新刊百家詩選又不盡

然如刪長篇則王建一人入選者凡三卷樂府長

篇悉載何未刊削王右丞韋蘇州十數大家何以

絕句亦不存一字余謂介甫一生好惡拂人之性是選亦然庶幾持平之論爾

順治末社事甚盛京師衣冠人士輻輳之地往來投刺無不稱社盟者後楊給事自西建雍疏言之部

議有禁遂止不行二十年來京師通謁無不用年

家眷三字即醫卜星相亦然有無名子戲為口號

曰也不論醫官道官也不論兩廣四川但通名一

槩年家眷亦可一笑也余所見不隨俗者惟龔尚

書芝麓鼎勞中丞介岩之二公而已

康熙甲辰先兄西樵以中州科場磨勘事自吏部

移法司會中秋合肥龔端毅之門生為置酒呼梨園部奏伎公愀然曰王西樵無妄在請室吾輩可樂飲乎遂罷遣樂人茗粥清談而已古道久廢特書此以勵薄俗

益都孫文定公廷銓為諸生時數有異徵一日天未

明自家赴塾過大街西關街名見一人負簷而立長過

於簷無他徑趨避其怪忽直前摔之文定急犇溪

西鳳山玉皇宮怪物亦涉水隨至文定方皇遽無

計忽自覺身驟長與之相等乃手搏之怪物錯愕

逃去又常讀書家塾有狐夜遺金豆十餘枚後既

貴人稱金豆孫家公順治中歷官吏戶兵三部尚書康熙元年拜相

或貽古鏡一視之乃先太師公故物也背有公自製贊云爾雅曰鑿謂之鏡釋名曰鏡景也言有光景也古之人目短於自見取諸鏡以觀其面夫鏡不設形而能有形故人舉其醜則怨鏡見其醜則善南華經云至人之用心若鏡不將不逆應而不藏故能勝物而無傷吁可以鏡矣讚曰榮兮玉光兮珠其用常明其中常虛左有文曰萬曆甲申年造上爲乾卦有小印爲象形公名也右一小印曰

桓臺王子廓公字也公故物惟此鏡與端溪小研一光潔如白玉亦有刻字曰王子廓家珍藏端研無銘

秦淮青溪上有張麗華小祠不知何代所建余賦詩二首紀之以存古蹟云璧月依然瓊樹枯玉容猶似憶黃奴過江青蓋無消息寂寞青溪伴小姑臨春樓閣已銷沉遺廟荒涼碧蘚侵惟有青溪鳴咽水至今猶自怨韓擒唐修隋史謂韓擒虎曰韓擒避廟諱也

蜀劍州西郭有小廟祀鄧艾余賦絕句示州人云

申屠曾毀曹瞞廟常侍還焚董卓祠劔閣至今思
伯約蜀巫翻賽棘陽兒明時有官陰平者立一碑
於道左大書曰鄧艾入蜀路見者笑之碎其石今
之立廟得無類是耶

若干二字出古禮鄉射大射數射算云若干純若
干竒若如也干求也言事不定當如此求之又曲
禮問天子之年始服衣若干尺矣漢食貨志顏注
云設數之名也亦曰如干又複姓後周有若干鳳
及右將軍若干惠若音人者反釋名云以國爲姓
右癸辛雜識所引極詳輒因或問而備錄之

岑詩山風吹空林颯颯如有人黃庶詩山精水怪
衣薜荔天祿辟邪眠莓苔余游廬山亦得句云薜
荔衣怪樹山風恐行人各寫一時所見而句法相
似然岑亦本古詩羅帷卷舒似有人開意非剽也
古人著述詩文一生心力所寄必有所托以思傳
於後世如白樂天寫集三本一付廬山東林寺一
付蘇州南禪寺一付龍門香山寺陸魯望詩文手
稿盡寘白蓮寺佛像腹中唐求詩草寘大瓢中投
諸岷江之流皆名心未忘故也如來自言四十九
年未曾說著一字乃亦以身後結集屬大迦葉豈

名心亦未盡忘耶頃襄城劉太乙青翰林書來云
欲自作八分書余漁洋蠶尾諸集詩藏於少林代
余謀所託意良厚因述此以報之

水仙之名甚美馮夷為河伯名曰水仙伯牙從成
連之海上作水仙操西湖有水仙王祠陶峴泛三
舟於江湖吳越間號為水仙他如雒妃湘君之屬
皆水仙也乃盜賊如孫恩流毒會稽吳興數郡及
勢窮投海死其黨亦稱為水仙甚可笑也脫清都
仙籍果有此輩正當與趙高李林甫同班爾

治喉閉急症用鴨嘴膽礬研極細以醞醋調灌吐

出膠痰立愈

癸辛雜識云帳帶
散用白礬不甚效

癸辛雜識又云熊膽少許用淨水略潤開盡去筋
膜塵土入冰腦一二片如淚痒則加生薑粉些少
以銀筋點眼能去障翳及赤眼最效

同年汪鈍翁小字液仙程石臞小字佛壯劉公戩
每自稱阿戩余在揚州日常有詩寄西樵兄及三
君云佛壯談詩登秘閣液仙趨府算錢刀還思阿
戩歸清潁仕隱無端愧汝曹天寧佛火共淹留千
里驚逢落雁秋何處憑闌望西北暮雲明月滿蕭
樓詩載漁洋前集

坡公作攬雲篇余昔行秦棧中見道左石罅間煙
氣如縷頃刻瀰漫山谷已而兩大至行人衣袖中
皆雲也始信囊雲非妄

工部郎官有街道廳一差出則二黑鞭前引而一
隸肩獨板在馬後汪郎中璽以啓賀其僚友某云
雙鞭前導宛兩股之蝦鬚獨板後隨如一條之狗
尾聞者無不大笑汪字樊桐仁和人作肅松錄
左良玉自武昌稱兵東下破九江安慶諸屬邑殺
掠甚於流賊東林諸公快其以討馬阮為名而并
諱其作賊左幕下有柳敬亭蘇崑生者一善說評

話一善度曲良玉死二人流寓江南一二名卿遺
老左袒良玉者賦詩張之且為作傳余曾識柳於
金陵試其技與市井之輩無異而所至逢迎恐後
預為設几焚香瀹訐片置壺一杯一比至徑踞右
席說評話才一段而止人亦不復強之也愛及屋
上之烏憎及儲胥噫亦愚矣

余小時見寶應吳敏道詩一卷頗有佳句僅記其
一絕云楊子江頭雨雙橈倚綠蕪愁心將客夢日
夜向東吳惜不憶其全矣

胡元瑞論明人歌行極尊空同而略於大復不知

分甘餘話卷二
三
何聽琴獵圖送徐少叅津市打魚諸篇深得少陵
之髓特以秀色掩之耳胡專舉明月帝京陋矣
明末暨國初歌行約有三派虞山源於杜陵時
與蘇近大樽源於東川叅以大復婁江源於元白
工麗時或過之

分甘餘話卷二

終

何物... 徐少... 市打... 隨特以... 胡... 明末... 國初... 蘇... 大... 工... 履時或過之

今甘餘話卷二

